

## “ In t’un momento “

Sòn tornaò a caminà sora le vecie piere pe’ là de le cube,  
in mezo a ‘l sighèò liegro de i fantulini che zòga,  
tra i balaùri e le càneve.

E’ de novo caminao sora i marmi e i mosaici de i nobili romani  
e de i sacri patriarchi e, in tè la penonbra e ‘l fresco de la Ciesa,  
è sintiò i antighi canti e le preghiere dîte sotovoze  
de le vecie co’l sial nero.

De sora de ‘l reparo, son tornaò a vèghe ‘l golfo e ‘l sò mar,  
un prao de blù co’ miera de vele dute colorae;  
quel mar grandò che de ‘l Oriente ‘rivèva i grandi barchi  
carghi de anfore piene de gran, de ogio e de spèssie;  
quel mar che ‘l portèva fresca bava liziera e grandi tenporai,  
o che de ‘ndola spuntèva le nere vele de i pirati Saracini.

È bevuo un bicier de vin co’ i amissi in ostaria,  
in mezo a ‘l fumo e a la confusion de mile discursi,  
in mezo a canti stonài e ‘nbriaghi de fumo e de vin  
e co’l sighèò e ‘l bastiemà de’l zogà a carte o de la mora.

Co’ la batèla è velisao inte ‘l mezo de ‘l paluo pe’ vèghe i casuni,  
le vale, i arzeni de fango e le seràgie, i tamarisi e i fiuri de tapo,  
le sgarzète bianche e i sievuli che sòlta.

...ma, in t’un momento, un rèfòlo de vento fredo ‘l m’à comò svegiào  
e i mie oci à visto un mondo scuro, fermo, silensioso e muto  
quasi comò ‘l fòssa distuaò.

E cussì xe restào anche ‘l gnò cuor ...

\* \* \* \* \*